

Competencia Arte di Palabra ta 7 di maart proximo



ORANJESTAD – Competencia di Arte di Palabra ta 7 di maart binidero na Santa Theresita Center na San Nicolas. Arte di Palabra ta un competencia di poesia y storia cortico pa tur hoben di enseñansa avansa.

Scolnan manera EPB, MAVO, HAVO y EPI (klas un cu dos) por participa na e competencia aki. Esaki John Flemming kende ta lider di proyecto a anuncia durante un conferencia di prensa na Fort Zoutman ayera atardi. Segun sr. Flemming Arte di Palabra ta un competencia literario cu a cuminsa na Aruba na aña 2009. Aruba a adopta e competencia aki di Corsou cu tabata haci esaki pa hopi aña caba. Departamento di cultura conhuntamente cu un grupo di corector di papiamento a hinca e proyecto aki den otro. Muchanan cu gana Arte di Palabra ta bay representa Aruba na Corsou den e competencia final entre e islanan Aruba, Corsou y Bonaire, dia 28 di maart. Ora e ganadonan wordo saca na Corsou, nan

ta haya oportunidad pa bin Aruba pa un intercambio cultural, pero e aña aki Bonaire a wordo scogi como destinacion pa e intercambio. Pues e ganadonan di Aruba, cu bay Corsou y logra gana lo bay Bonaire tambe.

Inscripcion



Sr. Flemming ta conta cu formularionan pa inscribi na e competencia aki a wordo par-



ti na tur e scolnan concerni y specialmente e docentenan di Papiamento a wordo curasha pa bisa nan alumnonan pa participa. E ultimo fecha pa inscribi na Arte di Palabra ta diabierna awo dia 27 di februari. Pa cada obra por inscribi solamente nomber di un persona.

Si e persona cu ta declama tin un of mas persona ta yuda e cu su participacion nan no ta bin na remarcia pa premio. Pa inscribi por haci esaki na artedipalabra@gmail.com of pasa departamento di cultura tambe.

E comision ta subraya cu aunke alumnonan tin derecho di uza efectonan special, esaki no ta influencia hurado. Nan ta enfatisa pa e hoben no laga efectonan adicional kita demasiado atencion. Hurado lo duna mas punto na un participante cu ta demostra cu e mes por presenta diferente personahe y no ta laga otro hende forma parti di su presentacion. Aparte di e biahe, cada participante lo haya un certificado di participacion y un regalo. Pa e ganadonan lo tin premionan atractivo disponibel.

Reglanan

E poesianan y cuentanan lo wordo husga riba uzo di bos, expresion y contacto cu publico.

E participante no tin derecho riba uza papel riba escenario.



E cuenta no mag di pasa 3 minuut. Y si un participante ta uza poesianan existente, e mester nota e autor original y haya permiso pa uza esaki.

Cosecha talento

Segun sr. Flemming, durante añanan largo Arte di Palabra a sa di cosecha hopi talento den sociedad. Hopi di e muchanan cu a descubri nan talento den e mundo literario, a sali di Arte di Palabra y a sigui den e mundo aki pa motibo di esaki. Hopi di e muchanan aki, a

sigui pa bira MC na diferente evento cultural, a declama poesia tur caminda rond di e isla. Na hopi ocasion e participantenan di Aruba a sa di sobresali na Corsou. Osvaldo Correa tin e titulo como esun cu a gana e competencia aki mas biaha, ganando 4 aña tras di otro. Otro poetanan local cu a sali di Arte di Palabra ta Samantha Trinidad, Angelle Stamper, Yakari Gabriel y Eileen Rasmijn. E meta mas grandi di Arte di Palabra ta pa promove e amor pa lenga materno. □

